

A SIMENZA MIRACULUSA

Commedia brillante in due atti di: **Rocco Chinnici**

Petru, maestro nell'arte del sapersi arrangiare, cerca con un insieme di espedienti di far soldi per tirare avanti la famiglia; ma li fa imbrogliando i clienti e vendendo loro sementi miracolose, ma...

Petru	erborista
Cuncittina	moglie
Filumena	comare
Marasciallu	
Appuntatu	
Capitano	

SCENA

(Un esterno. Bottega di Erboristeria, con appesi mazzetti di erbe, aglio, peperoncino...)

CUNCITTINA

(Petru, intento a togliere sementi dalle pere. Le sementi le mette da un lato mentre le pere le butta in un contenitore di spazzatura; Cuncittina osserva sbalordita) Ma si po' sapiri, u picchè di ssu spreco? Si po' sapiri ca fari cu ssi sementi chi metti di latu? Nun è ca ti partju u cidiveddu a oj e 'ncuminciasti cu dari i nùmmari? Viditi chi malaminnitta! Jittari i beddi pira e pigghiari i sementi! *(Silenzio)* E cuntinua, oh! Cu tia parru! Si po' sapiri chi stai facennu, ti dissi?

PETRU

E zittuti locca! Nun vidi chi staju travagghiannu?

CUNCITTINA

(Ironica) Ah, si! Sta travagghiannu! E comu a jttari i pira e a tiniriti i simenzi?

PETRU

Propriu accussì, jttari i pira e tinirimi i simenzi; haj quarchi cosa 'ncuntrariu?

CUNCITTINA

Ma viditi signuri chi facci di buttana chi havi! Allora u sai chi facemu?

PETRU

Sintemu, abbasta ca ti 'ntuppi ssa vuccazza di cascetta.

CUNCITTINA

Pinsavu di jutariti macari ju, e... u sai comu? Chi munnu aranci, li jettu e mi tegnu i scorci! Eh, chi nni penzi? A vidiri chi guadagnu ca facemu!

PETRU

(Meravigliato) U sai chi a chissa d'aranci, ancora nun ci avia arrivatu!

CUNCITTINA

Ah, no? Ma comu, nun avemu un sordi pi fari 'na lira; nun avemu mancu di chi manciari e jetti i pira? A sapillu, non mi l'avissi fattu bugghiuti quattru!

PETRU

E cuntinua ancora! Chistu è un travagghiu novu, u vo capiri!

CUNCITTINA

(Ironica) Ah, è un travagghiu novu! Ma viditi chi cosi! E... u vecchiu... u travagghiu vecchiu, 'nveci qual'era?

PETRU

E cuntinua, oh! U sai 'n veci chi haju pinsatu?

CUNCITTINA

Ora signuri mé! Puru!

PETRU

(Meravigliato) Ma... puru chi, si ancora nun t'haju dittu a chiddu ca haju pinsatu?

CUNCITTINA

No! Dicia... puru! Comu esclamazioni di meravigghia chi tu rinesci macari a pinsari.

PETRU

Ma chi pigghiasti a currenti sta matina, chi divintasti così elettrizzata? Oh, ma comu si fa chi nun ci nni va bona mancu una! Comu, propriu tu nun avissi di chi ciatari supra a chissu.

CUNCITTINA

(Ironica) Comu, comu! E picchè?

PETRU

E 'nsisti, oh! Ti pari ca si zitti! Unu 'un voli nesciri nutulari o chianu e idda...

CUNCITTINA

Travagghiu novu, nutulari! Senti, ma ti pari u mentu di jucari e quiz, chistu? Parra, parra pi quantu ti capisciu!

PETRU

Dicu chi proriu tu nun avissi di chi parrari, supra ssu fattu di... pin-sari, picchè si ora si cu mia... a turturarimi tutta la santa jurnata, è picchè ddu jornu ca ti canuscivu, era ju chi nun pinsava propriu, e chi si l'avissi fattu... corpu di sangu a mia! Tu nun avissi mancu avutu sta fortuna d'aviri divintatu signura!

CUNCITTINA

Aspetta... aspetta! Divintai... signura... cu tia? Senti, pezzu di baccalaru a bagnu maria, vidi ca ju, signura, c'era di prima chi canuscivi a tia, o chi ti pari!

PETRU

(Sbalordito) Comu, comu! Di prima ca canuscivi a mia? Quindi voli diri ca ju... nun fuvu... u primu, chi... *(allusivo all'averla posseduta, fa le corna)* Allura...

CUNCITTINA

...Allura, 'nzoccu? E chiudi ssa manu, gran pezzu di babbasunazzu! Io 'ntinnà diri... signura, comu purtamentu, ducazioni... Ma già, chi ti staju a diri a tia sti cosi, gran pezzu di zaurru chi nun si avutru! Tu, ti sei incivilito (*errori voluti*) conoscendomi a me. Si tu, 'nveci, c'avissi di chi ringraziarimi pi ddu jornu ca mi trovasti 'nno si; baccalaru a ghiotta ca nun si avutru! Oh, e pensa, puru! Picchè non penzi chiuttostu a comu fari pi mettiri supra a pignata? (*Ironica*) E dd'avutra to matri! Dd'otra to matri! ca mi rialò un sirviziù completu di pignati!

PETRU

Ancora cu sta camurrìa du sirviziù di pignati! Si po' sapiri, ora, chi ci trasi me matri e u sirviziù di pignati?

CUNCITTINA

Ah, nun c'entra dici? Comu! Havi cchiù di decianni ca semu maritati... malidittu ddu jornu, e ancora 'nn'avemu di 'ncignari (*usari*) una di pignàta! Mancu ca jinchemu 'na gnuni. Nun era megghiu chi to matri si ccattava 'na bedda pilliccia e si nni java a passiaru a villa!

PETRU

'Ntantu chiuditi ssa vuccazza di cascetta ti dissi, e a passiaru a villa ci porti a to soru, bastasunazza e linguta chi nun si avutru! Viditi, signuri me, chi sorta di rusariu haju di dirimi a ogni matina! E poi, ti dissi chi staju travagghiannu, travagghiannu pi vidiri comu mettiri supra... a pignàta! U vo capiri?

CUNCITTINA

Ah, quindi tu... jetti i pira, e... teni i simenzi... pi quantu mittemu supra... a pignata? (*Ironica*) Ma lu putivi diri prima! Aspetta, aspetta chi vaju e mi japru finamenti u paccu di pignati chi ancora è siggillatu e cu quattru idita di pulvirazzu.

PETRU

Quattru idita di pulvirazzu! Ora si ju ti dicissi 'ngrasciata, nun m'avissi di battiri i manu?

CUNCITTINA

'Ngrasciata, tu u sai a cu l'hai di diri! Viditi, mischinu, quantu è travagghiaturi e ju ancora chi nun l'avìa caputu! Senti, vidi chi comu tornu, si non mi spieghi veramenti comu fari a mintilla supra... pi da veru, ta rumpu 'n testa a... pi-gna-ta! (*Esce brontolando*).

PETRU

Haju 'na strana 'mprissioni chi a chista si nun ci accurzu a lingua...

MARASCIALLU

E pirmissu, mastru Petru? (*Pietro è sempre intento a togliere le sementi e buttare le pere*).

PETRU

Oh, a biddizza du marasciallu! A chi l'haju a serviri a oj?

MARASCIALLU

Chi avemu, chi avemu sta matina di novu?

PETRU

Marasciallu, unni sta putìa, c'è sempri quarchi cosa di novu! Aspittasi chi finisciu di fari stu sirviziù e a servu. (*Il maresciallo s'accorge di quanto egli sta facendo e sbalordisce*).

MARASCIALLU

(*Osserva meravigliato*) Mastru Petru, o ju nun vju bonu, o puru nun capisciu chiddu ca stati facennu; mi vuliti spiegari? Jttati i pira e pigghiati i simenti?

PETRU

(Finisce di mettere da parte le sementi) Oh, eccuti cca! Trenta coccia!
Ah, si sapissi, Marasciallu! *(Cattedratico)* Chista è l'ultima trovata di
l'agraria; frisca, frisca, nuvità assoluta!

MARASCIALLU

Ma chi, i... simenti di pira? E... i pira, pi davveru i jttati?

PETRU

E certu chi jettu! Chiddu ca hannu valuri... chisti sunnu! *(Mostrando i
semi)*.

MARASCIALLU

'Nzoccu! I simenti?

PETRU

(Va a guardare se viene qualcuno) E allura chi! Chissi, chissi! E sapi
picchè servinu?

MARASCIALLU

E certu! Pi siminari e fari avutri arvuli...

PETRU

Ma quannu mai!

MARASCIALLU

Ah, no! E a chi allura?

PETRU

Servinu... pa pignàta!

MARASCIALLU

(Sempre meravigliato) Pa... pignàta? Ah, si mettinu dintra a pignata,
e... si rimina?

PETRU

(Sentendo quasi il desiderio di mangiare) Macari! *(Ripendendosi)* No,
nenti... nun si rimina nenti, vulia diri chi nun sunnu chisti ca si
mettinu dintra a pignàta; chisti fannu mettiri avutri cosi *(sillabato)* di-
ntra a pi-gna-ta.

MARASCIALLU

Mastru Petru, ma vi sintiti bonu? Oh, mi sta parennu u cuntutu di tri
surdi! Ci criditi chi nun haju caputu mancu 'na virgula di stu discursu?
Ma chi è quarchi quiz chistu ca vidistivu a talavisioni e u stati facennu
a mia?

PETRU

A talavisioni, si! Chisti, servinu *(va ancora a guardare se viene
qualcuno)* a...

MARASCIALLU

(Quasi indispettito, alza la voce) Servinu, servinu, ca parrati!

PETRU

Ssst!!! Non gridassi! Menu nni sentinu e megghiu è.

MARASCIALLU

Eh, quantu misteru sta matina, mastru Petru! Chi mi pariti stranu! E
chi è, simenti sunu! Mancu si fussinu pinnuli miraculusi!

PETRU

Eccu, bravu! Dicistivu giustu; nun mi vinìa a parola, pinnuli
miraculusi! *(Con molta enfasi, misterioso)* Cu chisti..., svulappa la
scienza! La 'ntelligenza si 'nn'acchiana e stiddi! Lu cidiveddu
diventa... geniu!

MARASCIALLU

No!!!

PETRU

Si, 'nveci!!!

MARASCIALLU

(*Meravigliato*) Cu i simenti di pira? Navutra, ora! E comu?

PETRU

Non ciù dissi, è 'na truvata di 'na ricerca di studii chi hannu fattu una crip (*errore voluto*) di scenziati.

MARASCIALLU

(*Sbalordito*) Ohhh! Pi ddaveru? Ci criditi chi nun l'haju 'ntisu propriu sta nutizia? E chi scrupreru, chi scrupreru?

PETRU

(*Cattedratico*) Hanno rinisciuto a scoprire la "peridiospirina!"

MARASCIALLU

(*Meravigliato*) Peridio...chi?

PETRU

No chi! Diospirina.

MARASCIALLU

Eh, chi vuliti, cu sta camurrìa di nomi difficili chi usanu sti scenziati! E chi voli diri?

PETRU

(*Con grande cattedraticità*) Dunqui... (*non ricorda*) Ci cridi chi nun mi ricordu cchiù comu avia dittu chi si chiama!

MARASCIALLU

(*Comincia a pensare anche il maresciallo*) Bonu, va! Mi pari... mi pari... peridio... spirina.

PETRU

Eccu ddocu! Chissa è! Peridiospirina, chi deriva da: peri... chi sarebbiru i pira; dio... chi è 'na truvata da Dio; e nel mentre che spirina è... no a spirina chi si pigghia pi quannu unu havi a frevi ma chi sta a significare come quarmenti che fosse un farmaco, un farmaco chi fa migliorari il cervelletto (*più confuso che persuaso*); capiu?

MARASCIALLU

Si propriu vaju di diri a virita... no! Nun haju caputu mancu 'na virgula di chiddu c'aviti dittu.

PETRU

Eccu, vidi? Sti simenti servinu macari a chissu, a fari capiri tuttu e subbitu!

MARASCIALLU

Allura...voli diri chi... cu chisti, s'apprenni di cursa; si diventa sperti'... 'ntilligintissimi?

PETRU

Di cchiù, di cchiùni!

MARASCIALLU

No!!! Scenziati?

PETRU

Ancora di cchiù!!!

MARASCIALLU

(*Ora va lui a vedere se viene qualcuno, e poi sottovoce*) Pi davveru? E chi fa, i vinni, i vinni sti... simenzi?

PETRU

Certu ca i vinnu! Non vidi chi l'haju preparatu una pi una?

MARASCIALLU

E... pi davveru nuddu ancora nni sapi nenti?

PETRU

Nuddu di nuddu! Non ciù dissi chi è 'na cosa frisca frisca?

MARASCIALLU

(Va a guardare se viene qualcuno) E ju, ju... mi pozzu ccattari? Pensa chi mi farianu beni?

PETRU

Si ci farianu beni... chi, chisti? Marasciallu, lei, cu chisti, putiria puru aumintari di gradi!!! Midagghi a unni egghié! Puru ppizzati d'arré i spaddi!

MARASCIALLU

(Ora è lui ad invitare Pietro a parlare a bassa voce) Ssst!!! Non gridati, chi ponnu sentiri. E... dicitimi... Assai, assai custanu?

PETRU

Eh, veramenti... un pocu... custanu!

MARASCIALLU

E quantu, quantu?

PETRU

(Guarda se viene qualcuno) Dunqui... Quinnici coccia... trenta euru!

MARASCIALLU

Minchiuna! 'Gna veru cari custanu!

PETRU

Eh, non ciù dissi! Fari 'na ricerca... custa un saccu di sordi! Sti scinzinati s'annu a pagari! O chi vi pari chi a ricerca a fannu a gratis! Però... poi... pi chiddu ca servinu...

MARASCIALLU

Dicu... è sicuru chi... pozzu puru aumintari...di... gradu e fari macari discursa di artu locatu?

PETRU

Artu locatu? Cu chisti ci japri un scilinguagnulu chi mancu vossia sapi chiddu ca dici! E' comu si avissi fattu 'na vita di leggiri libra e libra! Studiu e studiu! Non ciù finivu di diri ora ora!

MARASCIALLU

E va beni, u sapiti chi fazzu? Mi ccattu tutti! Però m'aviti di fari u scuntu?

PETRU

E comu, staju 'ncuminciannu ora e già parramu di scuntu?

MARASCIALLU

Mastru Petru, i tempi scarsianu, 'ncumincianu a essiri stritti!

PETRU

I tempi, marasciallu, strincinu pi tutti. Anzi vossia havi un beddu pusticeddu...

MARASCIALLU

U pusticeddu, si! Pi chiddu ca nni passa u governu... e u rrischiu? U rrischiu unni u mittiti? Chi nni ponnu puru sparari? Sparari! U capistuu? Chi è comu a vui, chi mali chi va putiti sparari quarchi minchiata?

PETRU

E bonu marasciallu; sapi chi facemu? Siccomu a oj su i primi ca vinnu; su trenta coccia, vinissinu sissanta euru, mi nni duna cinquanta e cu sa vistu sa vistu. Però... non ciù dicissi a nuddu chi ci desi a stu prezzu! Eh, picchè allura... u guadagnu si nni va pi strata! (*Li avvolge guardingo in un po' di carta e glieli da*) Eccu cca, tinissi.

MARASCIALLU

Tiniti cca i sordi, e... (*guardingo*) mi raccumannu, puru vui... mutu, ah! Non diciti 'ngiru ca ju mi ccattavu sti simenti! U sapiti com'è...

PETRU

Ah, allura appostu! Ju un u dicu nenti; vossia nun parra... e così è sicuru chi nun saprà nuddu nenti! A li vostri cumanni, marasciallu.

MARASCIALLU

(*Stava per andarsene*) E... navutra cosa, un cocciu di simenza mi le pigghiari... prima, o dopu i pasti?

PETRU

Io ci dicissi di pigghiarisinni una a sira, dopu i pasti e prima di curcarisi.

MARASCIALLU

Comu dopu i pasti e prima di curcarimi? Ju, a sira, dopu manciatu mi vju un pocu di talavisioni; comu fazzu a sapiri quannu è dopu i pasti e prima di curcarimi?

PETRU

Raggiuni havi! Però... vossia non dissì chi si vidi a talavisioni? E allura sa po' pigghiari duranti a pubblicità.

MARASCIALLU

E... una, dicu... una sula, nun ma pozzu pigghiari ora? Vulissi 'ncuminciari cu fari a prova; vui mi capiti...

PETRU

(*Si sente parlare Concetta che rientra con la pentola in mano*) Sapi chi fa, sa pigghiassi strata facennu, chi sta rrivannu a me signùra, e chidda... è un telegiornali, ma 'nzamà diu sapi 'na cosa di chista, jnchi u paisi... chi lei si ccattò...

MARASCIALLU

No, no! Quannu mai! Subbitu, subbitu, mi nni vaju subbitu! (*Esce*).

PETRU

(*Sbalordito, va a guardare da dov'è uscito*) Minchiuna! Chissu, ora, è cunvintu chi havi a divintari Generali! (*Guarda i soldi*) Cinquanta euru quattu coccia di simenza di pira! A chissu mancu Patri Piu u sarva!

CUNCITTINA

Eccumi cca! Chi fu, chi parri sulu ora? Quantu videmu. Allura, a vidi sta (*alzando la pentola come a volergliela dare in testa*) pignata; si nun mi dici comu fari pi mittila veramenti supra, ju... (*Rientra il maresciallo*).

MARASCIALLU

Oh, signura Cuncetta! (*Concettina che aveva la pentola alzata cerca di giustificarsi*). E chi fa, balla?

CUNCITTINA

E... si! Veramenti stava facennu du passa di ballu spagnòlu... (*fa due passi di flamenco, e...*) Olé!!!

MARASCIALLU

E comu cu a pignata 'n manu?

CUNCITTINA

Eh, a me maritu, stu... tipu di ballu... (*allusiva*) ci piaci chi u fazzu cu a pignàta 'n manu! E' veru... Pitriueddu?

PETRU

Acchi jornu ssa pignàta ta fazzu agghiuttiri... No, nenti vuliva diri...

MARASCIALLU

Ah, siccomu nun havi i nacchiri... (*A Pietro*) Vossia senti mastru Petru, haju pinsatu...

CUNCITTINA

Chi è puru lei, marasciallu...

MARASCIALLU

(*Preoccupato, a Pietro u n po' in disparte*) Puru ju chi? Chi forsi già... idda... u sapi?

PETRU

Ma quannu mai! Idda, vulia diri...

MARASCIALLU

A li curti, mastru Petru, turnavu picchè ci vuliva diri, ma... li pira, a quantu custanu o chilu?

PETRU

A un euru e cinquanta.

CUNCITTINA

A lei, marasciallu, ci putemu dari puru a un euru.

MARASCIALLU

Ah, puru a un euru! (*A Concettina*) E... mi dicissi 'na cosa, signura, un piru quantu coccia di simenza havi?

CUNCITTINA

(*Meravigliata*) Di... simenza?

PETRU

Marasciallu, parrassi cu mia, ci dissi, chi me mughieri no nni sapi nenti du discursu!

MARASCIALLU

Mastru Petru, haju pinsàtu: e nun era megghiu chi mi vinniavu un chilu di pira, allura? Nun mi custavanu cchiù picca? Avogghia di simenzi chi ci avissi attruvatu! E i pira mi l'avissi puru manciatu!

PETRU

(*In disparte*) Marasciallu, ma quantu simenzi si manciò?

MARASCIALLU

Sulu una, giuru!

PETRU

Vidi, vidi ca misinu a fari effettu? E si nni manciò una; avanti chi si mancia tutti ti vogghiu!

CUNCITTINA

Chi è stu discursu?

PETRU

Ora chi fa voli chi u sapi puru me mughieri u discursu? Pi oj non si nni manciassi cchiù simenzi, si nno u cidiveddu di fora ci nesci. E ora si nni jssi, si nno me mughieri jinchi u paisi chi lei...

MARASCIALLU

Ma quannu mai! Mutu, nuddu l'havi di sapiri! Voli diri chi a prossima vota mi ccattu i pira. Salutamu... signura.

CUNCITTINA

(Fa un passo di flamenco al maresciallo e...) Olé!!! *(Il maresciallo esce. Poi al marito).* Ma... dimmi 'na cosa, chi è stu discursu di simenti di Pira? Nun mi diri...

PETRU

(Tiene aperti in una mano alzata i biglietti dei cinquanta euri e...) Olé!!! Teni, va metti a pignàta, grannissima 'nchiollara ca nun si avutru!

CUNCITTINA

No!!! Ma chi ci 'mpaccasti? Si po' sapiri chi ci 'mbrugghiasti? Fa cuntutu chi chissu torna cu i manetti. Tu, si pazzu! Vinnirici i simenti di pira... *(guarda i soldi)* quantu sunnu? Cinquanta euru! E si po' sapiri a chi cosa ci dicisti ca servinu ddi... simenti?

PETRU

Ci dissi chi servinu pi sviluppari a scienza; divintari 'ntelligenti...

CUNCITTINA

I trovi propriu comu i vo tu! Pi sviluppari a scienza! *(Alludendo al maresciallo)* 'Gna prima di tuttu ci voli u cidiveddu! E certu chi si ccattò... iddu! A mia havii di truvare! I simenzi pi sviluppari...

PETRU

A tia t'avissinu fattu sicuramenti effettu! Sulu chi ci nni avissinu vulutu un cammiu di pira cu tuttu ssu cirividdazzu chi ha! Ma è mai possibili chi nun ti nni va bona una? Teni *(le da i soldi)*, teni cca, va metti supra a pignata.

CUNCETTA

(Prende i soldi) Sì, però sugnu sempri du pareri chi quarchi ghiornu di chistu, dintra 'na cella di prigiuni ti vju. *(Esce ripetendo meravigliata)* Signuri me, cinquanta euru pi 'na manciata di simenza di pira!

PETRU

Oh, e chidda da pignata finarmenti a risurvemu! 'Nca va chi nun ci cridia mancu ju di putiri fari picciuli cu nenti! E' propriu veru, nun si po' fari assai sordi, cu sulu suduri di la frunti. Quantu mi preparu avutri simenzi, avissinu a 'ncuminciari a veniri avutri crienti, servi chi l'haju già pronti. *(Ne prepara un po' mentre si sente cantare Cuncittina fuori scena).*

V. F. SCENA

(Qualsiasi motivo, stornellato) Oh, chi truvata chi appi Pitrinu / pi fari sordi senza sudari, / vinni simenti a li scimuniti / e mazzi d'erva a li rimbambiti. / Oh, bello è / megghiu di chistu no no nun c'è! /

PETRU

Cuncittina, oh Cuncittina! Ma mai tiscicanu li argi? Ti vo stari muta? Ma fari perdiri i crienti? *(quella continua).*

V. F. SCENA

Su marasciallu s'adduna du truccu / veni di cursa e ci metti i manetti. / Oh bellu è, / megghiu di chistu non nun c'è!.

PETRU

A lingua! A lingua t'avissi a cadiri! *(Smette di cantare)* Oh, si zittiu finarmenti! E allura *(conta le sementi)*, sunnu trenta; e vinissiru sissanta euru... sta vota mancu si veni u presidenti da repubblica ci fazzu scuintu! *(Arriva qualcuno).*

FILUMENA

(Entra, vestita trasandata e triste) Salutamu, cumpari Petru.

PETRU

Oh, a biddizza da cummari Filumena! Chi c'è, c'aviti chi siti accusi trasannàta?

FILUMENA

(Si toglie il foulard che aveva al collo e lo poserà su qualcosa e che dimenticherà andando via) Sugnu nne guai, cumpari Petru! Haju a me maritu chi havi 'na matinata chi jetta vuci pu iditu du pedi!

PETRU

U cumpari? E chi fici, su rumpiu?

FILUMENA

Ma quannu! Havi l'unghiu du iditu grossu 'ncarnàtu.

PETRU

Mi parìa chi era! E... scusati, picchè non ci tagghiati l'unghiu?

FILUMENA

Nun pozzu. Havi u iditu vunciu comu 'na buffa; cosi!

PETRU

E comu?

FILUMENA

E chi vaju a diri! U misi passatu... nun sapennu a causa di stu duluri, curremu pu spitali... nun ci gnissaru u pedi!

PETRU

Ma chi, pi lugnu 'ncarnàtu?

FILUMENA

Pi chissu, 'gna si! U sapiti com'è nne spitali, comu riva u primu malatu ci fannu li spirimenti, tutti li stranì di stu munnu. A me maritu ci gnissaru u pedi pu iditu 'ncarnàtu; e a donna Carmela nun fu peggìu ch'avia l'ulcira perforata e cuntinuavanu a mittirici i gocci du colliriu 'nna l'occhi! Cumpari, forsi è megghiu lassallu perdiri stu discursu. Pari chi su misi a posta o cunigghiu, comu riva u primu

malatu, 'ncumincianu: "tu pigghi tu, o mu pigghiu ju, tu pigghi tu o mu pigghiu ju?" Si passanu tempu cu culu di lavutri.

PETRU

'Nn'haju tortu quannu vi dicu chi a megghiu midicina è l'erva?

FILUMENA

Ma l'erva nun po' serviri a tutti cosi! 'Na ruttura, o macari un partu... comu faciti cu l'erva? Ci passati 'na rama di rosamarinu supra a panza di cu havi a cattari pi faricci nasciri u piccididdu? U sapiti comu finì cu me maritu? Chi vannu mi ci levanu u issu e si ddunanu, finarmenti, chi era di l'ugnu ca ci vinìa u duluri!

PETRU

E ora, ora... chi faciti? ...Ciù tagghiati l'ugnu, finarmenti?

FILUMENA

E non vu dissi chi l'havi u iditu vunciu comu un tamburinu e troppu 'nfiammatu? E' pi chissu chi vinni unni vui, pi quantu mi cunsigghiassivu quarchi midicini pi putiricci livari a 'nfiammazioni.

PETRU

Ah, nenti di menu! Sintiti chi faciti, vi dugnu 'na manciàta di cicòria; a bughhiti, a sculati; poi pigghiati l'acqua e a mittiti dintra u frigurifiru, e quannu è bedda ghiacciata, pigghiati e ci faciti un beddu cristeri a vostru maritu.

FILUMENA

Chi cosa, u cristeri? Cu l'acqua da cicoria... ghiacciata?

PETRU

E certu! Non dicistivu chi havi 'na forti calurìa, 'nfiammazioni? E a cicoria..., chi è un forti rinfrescanti... e cu l'acqua ghiacciata, ci leva

a 'nfiammazioni d'un tuttu, e così, finarmenti ci putiti tagghiari l'unghiu 'o cumpari. U capistivu?

FILUMENA

Così, diciti?

PETRU

Cummari, a veru midicina non vu dissi, è nni l'erva, u vuliti capiri si o no! L'erva guarisci tuttu!

FILUMENA

Si, ma... cu l'acqua ghiacciata...

PETRU

E scusati, cu l'acqua bugghiuta nun ci pigghianu a focu i budedda?

FILUMENA

Chissu è veru, e su diciti vui... E... nautra cosa, (*va a guardare se vine la comare*) dicistivu chi l'erva guarisci tuttu; ma... tuttu... tuttu?

PETRU

Ancora! Si vi dissi tuttu, voli diri tuttu!

FILUMENA

E dicitimi; nun è chi vui avissivu quarchi pocu d'erva pi fari... di dari a vostru cumpari, pi...

PETRU

E non va desi! Comu ci fati ssu beddu cristeri, e... cu l'acqua ghiacciata mi raccumannu, viditi chi nun havi cchiu nenti.

FILUMENA

Ju... veramenti... nun mi riferisciu o iditu 'ncarnatu, ma...

PETRU

Ma... chi? 'Nca parrati!

FILUMENA

(*Timidamente*) Veramenti, cumpari, ju... mi virgognu; eccu si! Mi virgognu... di dirivi...

PETRU

(*Capisce l'allusione*) Ah, ora capisciu! U cumpari nun fa u so... duviri? E certu! Sicuramenti è dovutu o forti dulùri o iditu, puureddu! Vui criditi chi cu chiddu ca sta passanu 'o pedi, havi testa di pinsàri a farei friffiti, friffiti? Daticci tempu di guariri, e poi viditi chi sicuramenti ricupera tuttu chiddu persu.

FILUMENA

(*Dispiaciuta*) Ma quannu! Quannu! Non viditi chi nun avemu mancu figghi? Havi di subbitu dopu chi nni maritamu, chi comu si mettì 'nno lettu... avutru chi friffiti friffiti e friiffiti friffiti! Mancu u tempu di 'n avemaria e runfa comu fussi addrummintatu di cent'anni!

PETRU

Ah, picchè... vi diciti i prieri prima di drummintarivi?

FILUMENA

Cu, u cumpari? I prieri si! I prieri ju mi dicu, pi quantu iddu...

PETRU

U capivu, nun mi diciti cchiù nenti. Nun pò' essiri chi u cumpari havi a quarchi avutra fimminazza pà testa?

FILUMENA

Ma quannu! E cu si l'havi a caricari a chiddu cu tutta dda gran panza ca havi!

PETRU

Chi dicitì, cummari! A panza è segnu di virilità!

FILUMENA

Haju a 'mprissioni chi vui vi viditi troppu firmi di fantascienza. A panza signu di virilità! 'n'avutra ora! Ma comu! vi staju dicennu ca...

PETRU

E allura 'un nni parrati cchiù; po' essiri chi o cumpari ci vinni a meno pausa!

FILUMENA

(*Sbalordita*) E certu! E a mia mi vinni a prostita!

PETRU

(*Preoccupatissimo*) No!!! Pi ddaveru, cummari? Minchiuni! Quannu si 'nfilà 'nta 'na casa!

FILUMENA

(*Sbalordita*) Cumpari, ma sicuru vi nni 'ntinniti di midicini?

PETRU

Picchì? Vuliti puru quarchi cosa pa prostata? (*Filumena è impietrìta*) U sapiti chi vi cunsigghiu? Di manciari rosamarinu pistatu...

FILUMENA

Cumpari! Dicu... stati schirzannu, veru?

PETRU

Ma quannu! Vui aviti a sapiri chi u rosamarinu...

FILUMENA

(*Alludendo*) Ah, u capivu, mi vuliti teniri in allegria, e vi ringraziu ca mi vuliti fari curaggiu schirzannu... Allura, ma dati ssa midicina o...

PETRU

Pi vui, o pi vostru maritu?

FILUMENA

Ancora pi mia dicitì! Finitila, ora.

PETRU

E va beni, u sapiti chi l'haju 'na cosa chi fa pi vostru maritu, però... vi l'aviti a pigghiari vui, cummari, così iddu non si dduna di nenti.

FILUMENA

Ju, cumpari? Forsi capistuu mali; è me maritu chi havi, sta... carenza di ormoni sessuali.

PETRU

U capivu, u capivui, e vi dissi chi vi l'aviti a pigghiari vui a midicina pi fari effettu supra a vostru maritu; u capistivu?

FILUMENA

E scusati, si ma pigghiu ju a midicina, comu fa a fari effettu supra di me maritu?

PETRU

Ma è semplici! Sta midicina è ricca assai di ormoni chi emananu odori spiciali, e allura, u cumpari chi havi carenza di sti ormoni, chi fa? Veni attrattu di questi odori e... mi capistivu?

FILUMENA

Dicitimi, ma vui veru vi nni 'ntinniti di pianti midicinali? Nun è chi...

PETRU

Allura, a vuliti o no sta midicina?

FILUMENA

E va beni, datimi ssa midicina.

PETRU

Ogni matina aviti a veniri cca ca vi dugnu un mazziteddu di basilicu friscu e a fogghia largha... e si! picchè si nun è friscu nun nni fa effettu. E allura vui chi faciti: ‘na vota fati a pasta cu pestu, nautra vota a pasta cu pumadureddu friscu, nautra vota...

FILUMENA

...U mettu ‘nto latti...

PETRU

Si vi piaci... ‘n’altra vota ci nni minuzzati du fogghi ‘nna ‘nzalata... ‘nzumma, aviti a truvare comu manciari u basilicu tutti i jorna, senza chi u cumpari si dduna di nenti, e vui viditi chi nun manca tempu chi diventa subbitu un ghiadduzzu. (*Filumena si fa un po’ brutta in viso*). E picchè faciti ssa facci?

FILUMENA

Eh, si sapissivu! A mia u basilcu mi fa mali...

PETRU

A chi, a prostata?

FILUMENA

E finitila ora, cumpari! Vulia diri chi ‘un mi piaci propriu, e u sulu pinsèri di manciarimillu tutti i jorna, mi fa cchianari i quadànati.

PETRU

Eccu, quadànati! Viditi chi già, cu sulu parrarinni, ‘ncumiau a fari effettu puru a vui u basilicu?

FILUMENA

Ma quali basilicu e basilicu, cumpari! Ca ju i quadànati havi d’un pezzu già chi l’haju! E a notti, mi giro, mi riggiru (*rabbia contenuta*) mi votu ‘nta ddulettu... e nun pozzu sfuari! Vui mi capiti. E’ sulu chi u basilicu nun lu digeru.

PETRU

Eh, cummari! U sapiti comu si dici? “Pi ‘n’amuri, milli peni”.

FILUMENA

E va beni, va beni! Spiramu quantumenu di ricupirallu st’a-mu-ri! E... dicitimi, pi quantu è chi l’avissi di fari sta cura?

PETRU

Pi quantu è u periudu da durata du basilicu; se misi.

FILUMENA

Quantu! Se misi? E comu fazzu? Nenti, lassamu perdiri; megghiu mi tegnu i quadànati e fazzu a monaca di crausura.

PETRU

A stu puntu rrvatu, ju dicissi chi a facissivu u stissu a prova, anchi pi vidiri si u cumpari... battiu (*gay*) di lautra menza; capistivu chi vogghi diri?

FILUMENA

(*Sbalordita*) Ri... cchiuni, vuliti diri? E chi, tuttu ‘na vota?

PETRU

Cummari, quannu ‘na cosa havi di veniri nun è chi tuppulia a porta! Ma poi dicu, vui nun lu viditi... comu parra? Comu camina?

FILUMENA

Veramenti cu stu iditu chi havi così, nun è ca si capisci bonu di comu camina, si è... comu dicitu vui; poi jetta sempri vuci chi havi duluri...

comu fazzu a capiri comu parra? Chissu comu guarisci u pozzu aviddiri.

PETRU

Facému 'na cosa, ju 'ntantu vu dugnu u basilicu, e poi diciditi chiddu ca vuliti fari.

FILUMENA

E va beni, datimillu.

PETRU

Tiniti cca, e... (*quasi da innamorato*) spiramu chi vi jutassi a scinniri a prissioni.

FILUMENA

Grazii cumpari (*si avvia e si ferma quasi sulla soglia*). Allora, dicistivu, bugghiu u basilicu, u sculu...

PETRU

Cummari, no u basilicu! A cicoria, a cicoria aviti a bugghiri!

FILUMENA

Raggiuni aviti cumpari! Attrovaci a testa a unni l'avia! Vi salutu.

PETRU

Attrovicci a testa unni l'havi! Idda... dici. Scummettu chi m'avissi a manciari quattru coccia di simenza pi capillu. Certu chi si putissi, 'o cumpari ci a dassi iu 'na manu a jutari a cummari... chi mi pari piatusa; nun è giustu vidilla soffriri così, puuredda (*entra Cuncittina*).

CUNCITTINA

Chi è, ti mittisti a fari volontariatu? Cu è ca ti pari piatusa e ci ha dari 'na manu?

PETRU

Oh, ma comu si fa, trasi sempri a puntu giustu! Pari fussi chiamata apposta! A cu voi chi le dari 'na manu? Attrovacci chi ti 'nzunnasti!

CUNCITTINA

Allura... è signu ca parri sulu?

PETRU

E ss'avuttra ci ammanca! Chi è (*alludendo al canto di prima*) finisti di bannari? Chissu modu di cantari è? Ca si diu mi nni scanza e libbira trasissi quarchi crienti, non pensi chi si nni scappava di cursa? Ma... senti, 'na cosa, u sapii tu chi a cummari Filumena avia a prostita?

FILUMENA

Ju! E cu mi l'avia di diri?

PETRU

Mischina, chi mi parsi piatùsa...

CUNCITTINA

Ah, eccu cu era a piatùsa!

PETRU

Signuri me, idda cu a prostita, so maritu cu a meno pausa e menzu ricchiuni; viri ddocu chi fortuna! E' comu fari un ternu 'o luttu.

CUNCITTINA

(*Sospettosa*) Senti, e tu comu fa a sapiri tutti sti cosi? Nun è chi vinni (*ironica*) a cummari Filumena, e voli essiri cun...furtata, di tia? Ti dissi chi a mia sta cummari nun mi cunvinci, nun mi piaci propriu!

PETRU

Ma chi ti sonni a notti sti cosi? Quali cummari Filumena e cummari Filumena! Cca nun ha vinutu nuddu!

CUNCITTINA

(Si accorge del foulard lasciato dalla comare) Ah, si! E chistu... di cu è chistu, du marasciallu?

PETRU

(Cerca d'inventarsi qualcosa) Chissu eni... eni...

CUNCITTINA

Aspetta chi tu dicu ju di cu eni. *(Esce a prendere una padella e rientra inviperita)*. Senti, fina chi 'mbrogghi a avutri è un cuntutu; ma cu mia u giochettu nun attacca propriu! Veni cca, *(Petru scappa)* cca a veniri, gran pezzu di 'mbrogghia populu chi nun si avutru! Viditi chi mi 'nteressa a mia du cumpari ricchiuni, e da cummari chi havi i calurii! Ci dici chi si havi i calurii, pigghia e si metti u culu ammoddu! Lassa chi veni cca, *(ironica)* a cu-mma-ri ca ci penzu ju a faricci scinniri a temperatura! *(Si corre a soggetto mentre si chude il sipario)*. Veni, veni ti dissi!

FINE PRIMO ATTO

SECONDO ATTO

(Scena come prima)

CUNCITTINA

(Petru intento a recuperare sementi da un cetriolo) Quarchi ghiornu di chistu, a tia, nun ta leva nuddu 'na 'nsaccata di bastunati! Vinniricci i simenti puru a patri parrucu! E sinu a quannu vennu sti cristiani a riclamari, a cosa si po' risolviri; ma, si diu unni scanza veni u marasciallu! U capisti, *(gli fa segno come se avesse le manette ai polsi)* veru, ca ti portinu dda? I simenti puru a patri parrucu!

PETRU

Ih, ma chi vò! Capaci chi puru iddu vuli umintari di gradi, macari divintari cardinali!

FILUMENA

Cardinali... cu, patri Attanasio? A chiddu Papa u ponnu fari! 'Mbrugghiuni, tragiadiaturi, zizzaneri...

PETRU

...Fimminaru!

CUNCITTINA

Tu zittuti! Chi tu si chiddu chi vulivi jutari a cummari Filumena *(sfotte il marito ironizzando)* picchè ti parìa piatusa! Ah, ma guai si a vju veniri cca!

PETRU

Ancora cu stu discursu! Ma comu nun ti siddìa! U sai 'nveci ca staju 'n pinseri chi u marasciallu ancora nun veni? Non passaru, già, du misi?

CUNCITTINA

E nun ha essiri cuntentu chi nun veni? Avissi a ringrazzairi a Diu 'nveci chi nuddu s'ha ddunatu ancora du 'mbrogghiu; chissu picchè è signu chi i simenzi si l'hannu ccattatu chiddi chi cidiveddu nun hannu propriu. Ma nun pinsari chi ti po' finiri sempri liscia! Ju ti cunsigghiassi di livaricci manu cu sti vinniti stranì, e ti metti a fari un travagghieddu onestu.

PETRU

E quali? Nun vidi chi crisi ca c'è? O vò chi rimitemu a pignàta o so posto?

CUNCITTINA

Ju, prima chi a mettu o postu è sicuru chi ta rumpu 'ntesta sta pignàta!

PETRU

U sai, a discursu di pignàta, chi haju pinsatu?

CUNCITTINA

Sintemu a cu ci l'havi a viniri.

PETRU

Ah, u capisti puru tu?

CUNCITTINA

Puru ju 'nzoccu?

PETRU

Senti chi fai, vistu chi i sordi piccamòra ci sunnu, prepara un beddu sucu cu carni di maiali, ci metti puru quattu cutini, 'na manciata di funci porcini, peperoncinu, aromi... 'nzumma 'na sarsa chi u sulu ciavudu havi a fari surgiri i morti di cent'anni; metti tutti cosi dintra a

pignàta e a 'nfilu sutta u tavulinu, chi o primu chi veni, dicennu di vuliri cuntutu e ragioni, ci pensu ju.

CUNCITTINA

Nun è chi ci avissi di perdiri puru... a pignàta?

PETRU

E moviti, locca! Chi si mi rinesci stu discursu, avutru chi pignati chi putemu ccattari!

CUNCITTINA

Avanti ca cunsumamu tutti chiddi ca mi rialò to matri, 'nn'avemu di cociri!

PETRU

E allura moviti, a cu spetti a carrozza?

CUNCITTINA

Un lu pozzu sapiri a chiddu ca vaju 'ncontru prima ca cosciu stu sucu?

PETRU

Moviti ti dissi, chi sentu c'avissi a veniri curcunu!

CUNCITTINA

Spiramu nun veni u marasciallu! (*Si avvia*).

PETRU

Ancora cu sta camurria di marasciallu! Cuncittina, mi raccumannu, u ciavudu s'havi a sentiri! (*Esce*) Spiramu chi funziona! (*Si rimette a togliere sementi*) 'Ntantu ju cuntinuu a preparari simenti, cu sapi... (*Arriva qualcuno; è la comare*).

FILUMENA

Salutamu, cumpari Petru.

PETRU

(Ha un sussulto) Un motu mi facistivu pigghiari! Ssst!!! Nun parrati propriu!

FILUMENA

(A bassa voce) E comu fazzu a farivi sentiri chiddu ca ve diri?

PETRU

Voli diri chi mu dicitu 'nautra vota.

FILUMENA

No vultu sapiri comu finiu cu cummari, si era ricchiuni o...

PETRU

(Preoccupato, va a vedere se rientra la moglie) Cummari, pi mia u cummari si po' puru drogari, jittari a mari... nun mi nni futti nenti, e u sapiti chi vi dicu, chi si tiniti pi davveru a saluti, jitivinni, avanti ca veni a cummari!

FILUMENA

(Petru sempre guardingo e preoccupatissimo) A cummari? E dopu ca veni chi po' fari, scusati?

PETRU

Fina ca veni cu nenti, forse... ma si diu mi nni scanza trasi cu a pignata 'n manu!

FILUMENA

(Si avvicina per tastargli la testa e guardalo meglio) Ma c'aviti chi faciti così? E' sicuru chi vi sintiti bonu?

PETRU

(Ha paura se entra la moglie, e indietreggia) No, no, no, no, no!!! Nun vi rrisicati a vicinarivi! A tuccarimi!

FILUMENA

(Sente odore) Chi ciavuru! Chi è, festa a oj? Pozzu *(Voleva entrare a vedere)* trasiri, cummari? Così servi chi salutu a cummari?

PETRU

(Preoccupatissimo la trattiene) Ma unni, unni jiti? 'Mmuca 'o lupu jiti? Ju vi cunsigghiassi di jirivinni a casa, vi dissi, chi chistu nun è jornu di festa, e nun è mancu jurnàta chi fa pi vui!

FILUMENA

Ah, picchè, sta forse mali a... cummari?

PETRU

Peggiu!

FILUMENA

Comu peggiu? Voli diri chi sta mali, mali?

PETRU

Oh, finarmenti u capistivu! Ci a statu cca u dutturi, e si nni ju propriu ora, ora! Un lu viditi chi mancu mancu ci pozzu trasiri ju!

FILUMENA

Ah, non si po' trasiri dda... ghintra?

PETRU

Sinu a quannu nun s'accerta chiddu ca havi a cummari, no! U dutturi pensa chi havi... "l'ucchialiti!"

FILUMENA

(Preoccupata, non capisce) L'ucchialinu? Chi fici, si ccattò l'ucchialinu?

PETRU

Ma quali ccattò e ccattò! “L’ucchialiti!” E’ ‘na malatìa ‘nfittiva chi si pigghia... a sulu guardari, e chi s’attacca forti, forti all’occhi. (*Mostra un paio di occhiali scuri che si trovavano posati li vicino*) I viditi chisti? I tegnu pi quannu idda mi chiama chi havi di bisognu! U capistivu? Mi mettu... quantu lu mali nun mi cuntaggia, (*se li mette*) viditi? E trasu.

FILUMENA

(*Preoccupatissima*) E ju, ju chi vi tucavu, allura... (*Si pulisce le mani di sopra*).

PETRU

E non vu dissi di nun vicinarivi! Di non tucarimi! Sapiti chi faciti? Jtivinni a casa di cursa e stricativi i manu forti forti cu un pocu di limuni e sali. Forza smuvitivi! Chi spittati chi l’ucchialiti vi cchiana ‘nta l’occhi?

FILUMENA

(*Premurosa*) Si, si di cursa! Mi nni vaju di cursa! (*Si avvia*) E... s’aviti di bisognu chiamatimi. (*Esce*).

PETRU

Gna veru ‘mpiccicusa è a cummari! (*Annusa in aria*) Minchiuni chi ciavuru! Cuncittina, Cuncittina! Prontu è?

CUNCITTINA V.F.S.

Staju vinennu!

PETRU

Spiramu ca funziona u discursu da pignata!

CUNCITTINA

(*Entra sorreggendo la pentola*) Ma chi fa cu ss’o cchiali misi?

PETRU

Ah, l’occhiali! (*Lo toglie*) Nenti... circava ‘na cosa...

CUNCITTINA

‘Na cosa? Circavi ‘na cosa cu l’occhiali du sulì? Unni, unni dicisti di mittilla a pignata?

PETRU

(*Indicando un tavolinetto li nei pressi*) Cca, mettila cca sutta.

FILUMENA

(*La posa e batte la testa nell’uscirla da sotto il tavolo*) Hai!!! Corpu di sangu a tia cu tutta a pignata. Amu a vidiri unni avemu a ghiri a parari!

PETRU

E ora, lassa fari a mia. Tu basta chi mi veni d’appressu a chiddu ca dicu, chi o restu ci pensu ju. (*Arriva qualcuno*) E cca c’è u primu!

CUNCITTINA

(*Preoccuata, implora un quadro di un santo appeso alla parete con un lumino acceso*) San Cisippuzzu, pinsatici vui! Spriamu chi un mi è u marasciallu! (*Va a guardare. Spaventatissima*) Oh madonna! Iddu, iddu èni!!! E c’è macari nautru carrabbineri! Nun è chi ti vinniru a ristari?

MARASCIALLU

Salutamu, mastro Petru! Bon giurnu signura. A oj nenti... ballitti?

APPUNTATU

(*E’ balbuziente a causa delle sementi che gli ha dato il maresciallo*) Adirato) Sa-salutamu! (*A Petru*) Vu-vui siti, ma-mastro Pe-petru?

PETRU

A sirvilla, appuntatu! Ah, (*Al maresciallo*) amu caputu! Vinistivu pi quantu vi dugnu quarchi midicina pi fallu parrari bonu!

APPUNTATU

La-lassati, pe-perdiri! Vi-vinni, pi-pi... pi.-pi...

CUNCITTINA

Scummittemu chi vinistivu cca pi pisciari?

APPUNTATU

Ma-ma quali pi-pisciari e pi-pisciari! Vi-vinni, pi-picchi Ma-mavissivu a pa-pagari i spi-spisi!

CUNCITTINA

(*Meravigliata*) Scusati, ma... i spisi di chi?

APPUNTATU

I-i i-iddu u sa-sapi!

PETRU

Ju nun sacciu nenti!

MARASCIALLU

Forsi è megghi parru ju. 'Nzumma, accurzannu, mastru Petru, dda simenza chi vui mi vinnistivu all'incirca du misi fa, e chi poi nun ha fattu nuddu effettu...

PETRU

Marasciallu, si viri chi a cura è longa, e si prima un la finisci di fari...

APPUNTATU

Mi-mi li-livastivu di pu-putiri pa-parrari!

PETRU

Ju?

APPUNTATU

E-e-e-e cu, me-me soru!

MARASCIALLU

(*Un po' adirato*) Ora basta, appuntatu, e stia sull'attenti! (*L'appuntato si mette sull'attenti*) So io quello che devo dire! 'N pochi paroli, ddi simenzi ca vui mi vinnistivu... e a caru prezzu, siccomu vitti chi nun mi facianu nuddu effettu, pinsavu di dariccinni corcuna al qui presente appuntatu...

APPUNTATU

(*Risponde come si suole rispondere all'arma*) Si-signor si, ma-marasciallu!

MARASCIALLU

...Pi vidiri si puru a iddu nun ci facianu nuddu effettu; nun ci nni ju una pi traversu e sta pirdennu a parola!

APPUNTATU

Si-signor si, ma-marasciallu!

CUNCITTINA

(*A quegli scatti sull'attenti dell'appuntato, sussulta*) Viramenti ju dicissi puru... u cidiveddu.

MARASCIALLU

(*Annusando in aria*) Sapiti chi sentu un ciavuru... particolari; troppu bellu! Chi è festa? Chi preparastivu di bonu, signura?

CUNCITTINA

(*Imbarazzata*) Ju... veramenti...

MARASCIALLU

Chi è, segretu e ... 'un lu putiti diri?

CUNCITTINA

Dicemu...

PETRU

(La toglie dall'imbarazzo) Nun ti prioccupari, o marasciallu ciù putemu diri, 'n amicu è! Veru marasciallu?

MARASCIALLU

(Non capisce) Ma... diri... chi cosa?

PETRU

Marasciallu, però... *(va a guardare se viene qualcuno e poi con tono misterioso)* Nun l'havi a sapiri nuddu! E *(indicando l'appuntato)* nni putemu fidari di l'appuntatu?

MARASCIALLU

(Meravigliato, non capisce) Nun è di stu paisi, però è un appuntatu in gamba.

APPUNTATU

Si-signor si, ma-marasciallu!

CUNCITTINA

(Sussulta) Corpu di sangu! Un motu mi sta facennu pigghiari! U facissi mettiri normali, *(parlando per l'appuntato che stava riggido sull'attenti)* marasciallu, chi pari s'avissi 'nghiuttutu un palaccioni!

MARASCIALLU

Riposu, riposu, appuntatu. *(A Petru)* E allura, chi mi stava dicennu?

PETRU

Ci stava dicennu, chi tantissimi anni fa, truvai unni 'na casa vecchia di campagna..., *(va a guardare ancora se viene qualcuno)* 'na casitta abbannunata cu sapi di quant'anni, e sutta na cropa (mazzu) di sarménti *(tralci di vite)*, 'na pignata. Ricordu chi ddu jòrnu avia 'na gran fami, marasciallu, e allura pi scherzu ci dissi... sempri a pignata, "pignatedda, pignatedda, chi di lu focu ju ti scanzu,/ priparami ora un beddu pitànzulu!" *(Con molta enfasi)* E chi fu! 'ntempu quattru e quattr'ottu nun vju a pignata chi fumava e china di beni di diu! E havi di tannu chi a tinemu sempri pronta e sutta a tavula, *(indicandola)* dda, a vidi? Sempri pronta pi quannu avemu a manciari...

MARASCIALLU

Si, ma già u ciavuru c'è, e senza chi vui ancora aviti parratu cu a pignata.

PETRU

Cu ciù dissi! Già ci l'aviamu cumannatu di preparari; nno mentri 'ntismu genti arrivari e a rimisimu sutta a tavula; ma nun sapiu chi eravu vuiavutri! Nun sapemu mancu chi nni tocca di manciari a oj! Però chiddu ca è sicuru è, chi megghiu di comu manciamu nun putemu; non senti chi ciavuru? Chisti sunnu ciavuri ca sannu di magia!

MARASCIALLU

(Guarda sbalordito l'appuntato) U sapiti chi a storia mi 'ncumincia a piaciri! E... mi vinni 'na bedda pinsàta! Si propriu nun vuliti chi spurgemu dinunzia pi truffa e danniggiamenti alle... *(indicando l'appuntatu)* persone... dicu giustu, appuntatu?

APPUNTATU

Si-signor si! Ma-marasciallu. Pe-però a pi-pignata to-tocca a mia, pi-pigghialla!

CUNCITTINA

Mi scusassi, marasciallu, e ju comu fazzu, chi m'havia abituatu a 'un cociri cchiù e a stari a panza all'aria, sapennu di nun prepararari cchiù a manciari?

PETRU

Chissu dici!! E nuautri comu facemu, ora, chi nun avemu dintra mancu un pocu di spisa pi manciari?

MARASCIALLU

Si è pi chissu (*prende il portafoglio e gli da un po' di soldi*), tiniti, tiniti cca, avogghia di spisa chi pututi fari; e lei, signura, voli diri chi sta un pocu cu a panza 'o sutta.

PETRU

E va beni; però chistu, (*riferendosi al sugo che c'era dentro la pentola*) a ricordu di l'urtima vota, prifirissi mu lassati cca. (*La svuota in una zuppiera*) Tinissi.

APPUNTATU

(*Principio di lite*) A mi-mia l'a-laviti a dari a-a pi-pignata!

MARASCIALLU

Chistu dopu u videmu, jamuninni per ora.

APPUNTATU

Chi-chistu u vi-videmu o-o-o-o-o-ra!

MARASCIALLU

(*Con ordine categorico*) Appuntato, le ordino di consegnarmi la pentola!

APPUNTATO

A-agli o-ordini, ma-marasciallu! (*Dando la pentola al maresciallo*).

MARASCIALLU

Vi salutu, mastru Petru! Signura! (*Fa due passi di danza spagnola e...*) Olé!!! (*Vanno via*).

PETRU

(*Va ad assicurarsi che si siano allontanati*) Olé, si! U vidi chissi dui, 'nnavissivu di manciari simenza! (*Alla moglie*) Vidi, (*mostrando con la mano alzata i soldi*) Vidi quantu sordi? Ducentucinquanta euru!

CUNCITTINA

(*Sbalordita*) No, no, no, no!!! Tu hai sicuramente quarchi rotella chi non ti funziona bona! Comu! 'Nveci di vidiri comu risolviri u primu discursu, nni nesci 'o chianu nautru!

PETRU

E zittuti, cataprasima! Cchiù tostu sai chi mi priocupa? Chi chissi mancu a casa rivanu; sicuramente, comu girinu l'angulu, provanu a pignàta e comu vidinu ca nun funziona tornanu subbitu arreri!

CUNCITTINA

(*Preoccupatissima*) E comu facemu? Ma dicu ju cu mi porta 'nta sti 'mbrogghi!

PETRU

E bonu ora! Senti chi fai 'nveci, e di cursa puru! Pigghi un sacchetti di chiddu ca si mettinu i cosi pi congelari, e ci metti 'na picca d'acqua cun pocu di culuri russu comu fussi sangu, e tu metti ppuntatu a ciancu sutta a vesta, chi dopu ci penzu ju. Comu iddi tornanu facemu finta di sciarriarinni, e tu vidi chi scherzu chi ci cumminu e du cumpari. Curri, moviti!

CUNCITTINA

Bedda matri! Mi scantu! Nun è megghiu chi ci dicemu i cosi comu stannu?

PETRU

Ancora! Oramai è troppu tardu pi pinsàri a chissu. Smoviti, 'nveci prima ca tornanu! E moviti! Chi spetta a carrozza? (*Esce di corsa*). E sinu a cca ci semu. Quantu fazzu un pocu di largu. (*Comincia a spostare e fare largo; cerca un coltello appuntito e lo trova nei pressi; gli scivola sopra la mano come a vederne il taglio*) Ecculu cca! Cu chistu c'è cumminari un scherzu a tutti dui chi su ricorderanno sinu ca campanu. (*Alla moglie*) Comu finì? Ancora assai ci voli?

CUNCITTINA

Arrivu, arrivu! Staju vinennu! (*Si sentono arrivare i due che ne vogliono di conto e ragione*).

PETRU

(*Finta di essere adirato, tiene il coltello dietro la schiena per non farlo veder ai due; come entra la moglie inscena una furibonda lite*). Cca, cca a veniri! Svirgugnàta!

MARASCIALLU

Eh, no, sta vota passastivu u limmitu, caru mastru Petru! Cca, cu sta cosa, (*mostrando la pentola*) nun succedi nenti! Nun prepara nuddu manciari, avutru chi stori!

CUNCITTINA

(*Rientra adirata*) Parra! Chi c'è? Chi hai chi fai sti gran vuci?

PETRU

Ti dissi chi tu nun ma fari fari sti fiuri cu marasciallu!

APPUNTATU

Sta-sta vo-vota vu-vulemu pa-pagati i spi-spisi, si-signura!

PETRU

(*Sempre agitato*) Ma... (*al maresciallo*) vossia ci dissi giusti i paroli a pignàta?

MARSCIALLU

Ci dissi pi filu e pi signu chiddu ca dicistivu vui: "Pignatedda, pignatedda, di lu focu ca ti scanzu, / priparanni ora un beddu pitànz!"

PETRU

Eccu ddocu! Vidi, vidi chi sbagghiò? Nun è pri-pa-ra-nni, ma... pri-pa-ra-mi.

APPUNTATU

E-e-e-e-e nu-nuatri du-dui se-semu!

PETRU

(*Alla moglie*) Vidi, vidi chi c'è ddocu? Non tu dicìa ju chi sicuramenti sbagliavanu? E ora, ora comu a mittemu?

CUNCITTINA

(*Sempre adirata*) Oooh!!! Ma chi vò di mia? Non foru iddi ca sbagghiaru? E poi... non ci a dasti tu a pignàta? Arranciativi, ora, tutti quantu siti!

PETRU

Ah, si, accusi ta penzi! (*Alza il coltello e glielo conficca... si a per dire, dove c'era il sacchetto col finto sangue*) Ca teni cca allura!!!

MARASCIALLU

(*Cuncittina cade a terra come fosse morta, si vede uscire il sangue. I due rimangono senza parole, impietriti*) Ihhh! Ma chi cazzu cumminastivu, mastru Petru!!! A vostra mughieri vi sciucastivu!

APPUNTATU

Chi-chistu è pa-pazzu, li-libiru, ma-marasciallu! A-a-tta-ttaccamulu!

MARASCIALLU

Mo capistivu chi mazzastivu a vostra mughieri?

PETRU

Ma quali ammazzari e ammazzari! Ci vosi dari 'na lizioni! Eh, idda l'havi a capiri chi dintra cumannu ju!

MARASCIALLU

Ma c'havi a capiri, pezzu di bestia chi nun siti avutru, chi l'ammazzastivu pi daveru!

PETRU

Ancora, marasciallu! Ora ci fazzu avvidiri chi nun è veru nenti; ci vosi dari 'na seplici lezioni. *(Prende dalla tasca un piccolo flauto o piffero e comincia a suonare una musicchetta orientale, mentre Cuncittina comincerà ad alzarsi lentamente seguendo il ritmo. I due rimangono stupefatti).*

MARASCIALLU

(All'appuntato) ...Dicu... vitti puru lei, appuntatu?

APPUNTATU

Si-signor si, si-signor ma-marasciallu!

MARASCIALLU

(Guarda, giranado attorno a Cuncittina, meravigliato, se è davvero viva) Minchiuna! E comu fu ca potti succediri?

PETRU

U vidi chistu? *(indicando il flautino)* Chistu... è un friscalettu magicu! Chi ju adopiru cu me mughieri ogni vota chi ce fari pigghiari 'na botta di cacazzu! U capiu u discursu?

MARASCIALLU

(Sempre sbalordito) Allura cu chistu, vui... Eh no! Nun ci cridu! Mi l'aviti a fari sunàri puru a mia!

PETRU

Ma... avissimu ammazzari all'appuntatu pi fari a prova?

APPUNTATU

(Fa un gestaccio) Tè!!!

MARASCIALLU

Chista si ca è 'na bedda miravigghia! E... dicitimi, nun è chi...

PETRU

(Glielo toglie velocemente dalle mani) Eh, no! Chistu non si vinni propriu! E... mancu si mi dassivu...

MARASCIALLU

...Quattrucentu euru?

CUNCITTINA

(Sviene) Oh, no!!!

MARASCIALLU

Oh, madonna!

PETRU

Ancora, marasciallu? No vitti chi è tuttu pi finta? Idda è convinta di essiri morta; ma... *(mostrando il fischiotto)*

MARASCIALLU

...U friscalettu! Si, ma ora u voghiu sunari ju, mastru Petru!

APPUNTATU

Ma-marasciallu, ju-ju!

MARASCIALLU

(Lo guarda in cagnesco) Uhm!!!

APPUNTATU

(Scatta sempre sull'attenti) Co-comandi, -sisignor ma-marasciallu!

MARASCIALLU

E la smetta, cu sta camurria di ginnastica, chi cca nun semu a caserma!

CUNCITTINA

(Il maresciallo comincia a suonare e Cuncittina si alza lentamente). Bedda matri! Unni sugnu? Chi mi sentu strana!

MARASCIALLU

U sapiti chi vi dicu? Eccu cca i quattu centu euru! *(Poi a Cuncittina)* Signura, nun bastanu quattu centu?

CUNCITTINA

(Sbalordita) Veramenti...

APPUNTATU

Fa-facemu 'na-na cosa ma-marasciallu; ju nni ne-nesciu 'na-navutri qua-quattu centu, e u-u-u-u-u fri-friscalettu nu-nu cc-ccattamu 'nze-nzemmula!

CUNCITTINA

(Sviene di nuovo) Oh, no!!!

APPUNTATU

Sta-sta vo-vota le-le su-sunari ju!

PETRU

(Preoccupato) Appuntatu, ma... nun è chi sunati pi comu... parrati?

APPUNTATU

Bo-bonu u so-sonu!

MARASCIALLU

Mastru Petru, e non si vidi ora si funziona!

PETRU

Nun vulissi chi sunassi mali e ju avissi a perdiri pi davveru a me mughieri!

APPUNTATU

Nu-nun vi pri-prioccupati (suona il fischiello mentre Cuncittina si rialza lentamente).

CUNCITTINA

Matri, chi mi sentu curiusa! *(L'aiutano a sederla sulla sedia).*

MARASCIALLU

E bravu all'appuntatu! U sapiti chi facemu ora? Turnamu a casa unni i nostri mughieri, armamu 'na sciarra e i mmazzamu cu 'na cutiddàta, tantu poi... sunamu u friscalettu e arriviscinu; servi chi accussì ciù facému pigghiari macari a iddi un beddu cacàzzu! Chi nni penza appuntatu?

APPUNTATU

(A Petru) Co-comu arrivu a ca-casa, pi-pigghiu u cu-cuteddu, l'a-lammolo bo-bonu, e... (facendo come a conficcarlo) zamt!!! Ce fari pi-pigghiari pu-puru a me mu-mughieri u-u-u-un beddu cacazzu! Sa-salutamu! (Escono parlando a soggetto).

CUNCITTINA

(Preoccupata, va ad accertarsi che i due siano già lontani) Ma... ti rendi contu di chiddu ca sta cumminannu? Chiddi, ora, vannu e ammazzanu i mughieri! Mo capisci?

PETRU

E chi è? Mali pi iddi!

CUNCITTINA

Ah, mali pi iddi! E s'avissinu ammazzatu a mia?

PETRU

Mali pi tia; comu vidi, ju, nun ci trasu propriu, quindi...

CUNCITTINA

Tu, si pazzu! Tu ha u cidiveddu foripostu! Tu sta facennu cummettiri du omicidi!

PETRU

Ju? E comu, cu friscalettu?

CUNCITTINA

Cu friscalettu, si!

PETRU

Teni cca, babbasunazza! Vidi quantu sordi? (*Prende un altro fischiello che aveva ancora in tasca*) Teni, e chistu tu rrialu a tia... (*Entra in casa*).

CUNCITTINA

Va facillu sunari a to soru! Ca comu s'addunanu da tragedia, nun vennu e ammazzanu puru a tia? (*Si sente chiamare e arrivare qualcuno; è la comare. Entra agghindata e con un grosso paio di occhiali scuri*).

FILUMENA

(*Sbalordita e mezza impaurita*) Vui, cummari! (*Si mette la mano davanti agli occhi*).

CUNCITTINA

Chi è, chi vidistivu u fantasma? Ju, ju sugnu! Non vi piaciu... ju? Ma chi vi mittistivu l'occhiali da sardatrici, o chi puru c'è eclissi solari?

FILUMENA

Vju chi siti schirzusa; chi fu, vi passò già... l'occhialiti?

CUNCITTINA

(*Non capisce*) L'ucchia... chi?

FILUMENA

Allura è signu ca vi pozzu guardari senza occhiali? Siccomu u cumpari dici chi pi guardari a vui m'avia di mettiri l'occhiali...

CUNCITTINA

Vui, l'occhiali scuri vi l'aviti a mettiri pi guardari o cumpari e no a mia!

FILUMENA

(*Non capisce*) Ah, chi forse l'occhialiti... a pigghiò... puru u cumpari?

CUNCITTINA

U cumpari, u cumpari a pigghiò! (*Allusiva*) E a pigghiò puru 'nforma difinitiva, e ju vi dicissi di un u guardari propriu, (*ironica*) si nun ci vuliti lassari a saluti!

FILUMENA

Bih! E chi fici, aggravò a malatìa?

CUNCITTINA

(*Sempre ironica*) D'assai, d'assai a ggravò; e vi cunveni turnarivinni a casa prima chi è troppu tardu!

FILUMENA

E certu cummari! Vi salutu. Chi disgrazii, quannu si 'nfilanu 'nta 'na casa! (*Esce facendo scongiuri*). “Fora malocchiu, e dintra bon'occhiu; fora mal'occhiu e dintra bon'occhiu; acqua cavudda e sucu d'approcciu”. (*Esce*).

CUNCITTINA

(*Andandole dietro con scongiuri*) “Acqua davanti, ventu d'arrieri, e balatùna 'nmenzu i pedi!” Oh! E finarmenti a st'avutra camurria 'nna livamu di 'ntunnu! (*Si sente suonare l'ambulanza*) Bedda matri! E a cu portanu 'o spitali? (*Arrivare qualcuno*) E cu è, ora? (*Va a guardare. E' un carabiniere*) Un carrabbineri! E chi voli chistu? (*Chiama il marito*) Petru, oh Petru! Veni, chi c'è un carrabbineri novu! (*Entra il carabiniere; avrà l'accetto nordista*).

CARABINIERE

Buon giorno signora! E' questa la bottega di un certo... Pietro?

CUNCITTINA

A sirvilla! Ju sugnu a mughieri; si voli mi po' lassari dittu a mia...

CARABINIERE

No signora! E' con lui che devo parlare... in privato. (*Entra Petru*).

PETRU

Ssabbenerica, brigateri! Chi è novu du paisi? (*Suona ancora la sirena*). E chi successi?

CUNCITTINA

Bedda matri! E chi c'è sta matina cu sti sireni?

CARABINIERE

E' per questo che mi trovo qui da voi, per la storia del maresciallo!

CUNCITTINA

(*Preoccupatissima*) Chi fici, mmazzò già a mughieri?

CARABINIERE

Il maresciallo? Ma no!

PETRU

Allura l'ammazzò... l'appuntatu, a mughieri?

CUNCITTINA

(*Capendo d'essere stati scoperti*) E ciù dicìa ju! Lassala perdiri sta vinnita di 'ntrallazzi! No! Ora u vidi, u vidi comu finiu? Chi murìu a mughieri di l'appuntatu!

CARABINIERE

(*Meravigliato*) E' morta pure la moglie dell'appuntato, quello che ha conficcato il coltello all'addome del maresciallo? Quello che parla balbettando?

PETRU

(*Guarda la moglie, sbigottito*) Comu... comu? Allura l'appuntatu un ammazzò a so mughieri?

CARABINIERE

Ma quando mai! Ha invece tentato di uccidere il maresciallo! Gli conficcò il coltello all'addome e poi... impazzito, tirò dalla tasca un fischietto e cominciò a suonarlo al collega riverso per terra e che non dava alcun segno di vita! Poverino, forse pensava di farlo risuscitare col suono del fischietto. Lo hanno portato al manicomio; per questo il suono delle sirene. Capito perché mi trovo qui? Ci hanno avvertito alla centrale e siamo dovuti accorre tutta la squadra.

CUNCITTINA

Allura, lei un vinni pi... me maritu?

CARABINIERE

Ma certo che sono venuto per suo marito! (*A Petru*) Non è lei Pietro?

PETRU

(*Continua a non capire*) Sintissi, brigateri...

CARABINIERE

Guardi che io sono Capitano, Capitano della squadra investigativa ch'è intervenuta a fare perizie alla disgrazia...

PETRU

E... ju, ju chi ci trasu, mi scusassi, cu discursu da disgrazia?

CARABINIERE

(*Meravigliato*) Lei? Niente!

CUNCITTINA

Allura me maritu... è nuccenti? (*Fa due passi di danza e...*) Olé!!!
(*Esce, facendo ogni tanto capolino per capire il discorso dei due*).

PETRU

(*Meravigliato, guarda Petru*) No, nenti, (*fa segno al carabiniere come se la moglie fosse matta*) E' fissata cu stu ballittu... (*il capitano non capisce*) chi è, nun capiu?

CARABINIERE

Senta, signor Pietro... poiché ho sentito il maresciallo balbettaremi all'orecchio di lei e delle sue sementi di pere miracolose... (*guarda se rientra Cuncittina per non farle capire*) che... pare aiutino... diciamo a sviluppare il quoziente intellettivo..., diventare più intelligenti insomma! volevo chiederle...

PETRU

Signor capitano, lei ristò 'nn'arrieri! Ddi simenti di pira comu dici lei, già sunnu fori moda!

CARABINIERE

(*Dispiaciuto*) No!!! Allora...

PETRU

Però... l'urtimu ritruvatu di la scienza agraria è cchù 'mpurtanti!

CARABINIERE

E... sarebbe?

PETRU

(*Cattedratico*) Li simenti di citrola! Basta manciarisinni una e lei scumpari d'un tuttu!

CARABINIERE

Vuol dire che non mi vede più... nessuno?

PETRU

Nuddu di nuddu!

CARABINIERE

Neanche... se mi metto davanti a mia moglie?

PETRU

Capitano, forse nun mi spiegavu bonu; cu chisti lei po puru jittari u... comu si dici... u giubbottu antiproiettili e si para davanti e banditi! Iddi nun s'addunanu di lei! U capiu? Nun ci ponnu sparari! Nun lu vidinu! Però nun s'havi a scurdari di pigghiarisi u coccu di simenza di citròlu, prima, eh!

CARABINIERE

Allora io, mangiandomi un semino di cetriolo... posso intervenire pure a catturare i banditi e... non mi vedono?

PETRU

Capitanu, lei, basta chi si mancia un cocciu di simenza ci dissi, ca po' caminari a nuda chi no vidi nuddu! (*Il capitano resta a guardare*) Nun ci cridi, veru? Si nni manciassi un cocciu ora e si nni po' turnari a casa puru senza mutanni! (*Ne prende una dal tavolinetto e gliela da*) Tinissi, sa manciassi.

CARABINIERE

Però, non mi ha ancora detto che durata ha l'effetto.

PETRU

E ddocu havi a stari attentu lei, picchè... si si mancia a simenza du citrolu di maggiu e allura havi a durata di deci minuti; mentri si è chiddu di giugnu dudici minuti, e così a jri avanti, a ogni misi scattanu du minuti.

CARABINIERE

(*Preoccupato*) E io come faccio a sapere a quale cetriolo appartengono i semi?

PETRU

Signor capitanu, i prezzi varianu a secunnu du misi! Si lei i pigghia di Maggiu hannu un prezzu; si pigghia di giugnu su cchiù cari, lugliu ancora di cchiù, e così pi l'autri misi. E' comu si lei ccatta 'na batteria bona chi havi 'na carica longa, chi costa o stissu di chidda ca havi 'na carica bascia? (*Il marescialo guarda sbigottito*) No capiu u discursu?

CARABINIERE

(*Cominciando a capire*) Ah, quindi a secondo per quello che servono bisogna chiedere di che mese è il cetriolo per avere la giusta durata! E... questi che ha lei di che mese sono?

PETRU

Eh! Chisti sunnu tutti du misi d'austu!

CARABINIERE

Che vorrebbe dire... Agosto?

PETRU

Eh, ju sulu di chisti tegnu!

CARABINIERE

Allora costano molto?

PETRU

Certu, custanu cchiù cari, però comu durata...

CARABINIERE

E il prezzo?

PETRU

Il prezzo, il prezzo! Dicemu ca ogni cocciu costa deci euro.

CARABINIERE

(*Sbalordito*) Dieci euro?

PETRU

Capitanu, i scinzati si fannu pagari! O chi ci pari chi studianu a gratis! Facemu 'na cosa, 'nn'haju vinticincu coccia, mi paga pi vinti e affari fattu; però nun lu dicissi a nuddu, si nno si rumpi a piazza!

CARABINIERE

E va bene! Ma... è sicuro che nessuno s'accorge di me?

PETRU

Ah, ma allura difficili è vossia! Sintissi chi facemu, chisti sunnu 'na confezioni di 25; una, chi l'avia misu di latu, ci a dugnu e sa pigghia ora, si spogghia e si nni po' ghiri a casa nudu chi un lu vidi nuddu!

CARABINIERE

Ah, quindi mi devo spogliare ogni volta che prendo una seme?

PETRU

E certu! Si nno si vidinu i fregi, i buttuna a fibbia... ma..., i mutanni cu i buttuna l'havi?

CARABINIERE

No, sono con l'elastico.

PETRU

E allura appostu semu; è comu farisi i raggi signor capitanu. Lei si l'ha fattu mai i raggi?

CARABINIERE

Si, qualche vota li ho dovuti fare anch'io.

PETRU

E allura, si pigghiassi a simenza e si spogghia, servi chi cumincia cu fari a prova.

CARABINIERE

Così dice? E va bene! *(Prende la semenza e incomincia a spogliarsi sino a che rimane in mutande).*

PETRU

(Finta di meravigliarsi, cerca) Minchiuna! Scumpariu d'un tuttu! E ora! Unni si trova, capitanu?

CARABINIERE

Sono qui, accanto alla sedia. *(Entra la moglie con due valigie di quelle vecchiotte che si usavano un tempo legate con lo spago, e fa finta di non accorgersi del capitano).*

CUNCITTINA

E allura, Petru semu pronti? Unni è, si nni ju u brigateri? *(Il capitano fa segni di compiacimento stropicciandosi le mani).* E... sti robbi cca 'nterra? Nun è chi ci vinnisti i simenti...

PETRU

E certu! Nun vidi chi scumpariu?

CUNCITTINA

(Facendo finta d'aver paura) E unni è ora? Bedda matri mi scantu! Ancora cca è? Nun è chi mi l'avissi avvidiri cumpariri nudu?

PETRU

Ma quannu! Si nni ju di corsa, prima ca finìa l'e-ffet-tu! *(Il capitano si ricorda dell'effetto ed esce di corsa, mentre i due lo seguono meravigliati).* E... dimmi 'na cosa, chi sunnu sti valiggi?

CUNCITTINA

Chi sunnu! Comu chi sunnu! Picchè tu vulissi stari ancora cca? I preparavu pi jrininni di corsa, scumpariri pi 'na pocu di jorna! Prima chi pigghiamu 'na 'nsaccata di bastunati! *(Prendono le valige)* Di cca, niscemu di cca! *(Si sentono voci in strada a soggetto per il capitano nudo, si sentirà anche una sirena d'ambulanza).* Pureddu, puru ambulanza arrivò! Di corsa, di corsa mi nni scappu! *(Esce, mentre Petru si porta con tutta la valigia sul proscenio e narrerà in rima la morale).*

PETRU

Finerinu li tempi di quannu Betta filava; ora mancu scura e nni nasci una nova!

Li tassi 'nchiananu sinu a li stiddi,
javuti, si ttisanu 'ntesta li capiddi.
Ora, chi cumpagnu nostru è lu bisognu,
si spremitu lu ciriveddu e nasci lu 'ncegnu.
Si lotta cu li denti pi comu manciari;
ci voli furtuna pirsinu a cacàri...
tintu cui nun sapi l'arti d'arranciaru.
Pi campari, strittu e maluparàtu,
nun c'è bisognu d'essiri avvucatu;
nun servi mancu aviri granni scola,
picchè... pi furtuna chi c'è ancora
cu cridi sempri... 'o miraculu di citròla.

SIPARIO